

卷之十
四八五

舊唐書卷四十八

後晉司空同中書門下平章事劉 昫撰

食貨志第二十八

食貨上

先王之制度地以居人均其沃瘠差其貢賦蓋歛之必
以道也量入而爲出節用而愛人度財省費蓋用之必
有度也是故旣庶且富而教化行焉周有井田之制秦
有阡陌之法二世發閭左而海內崩離漢武稅舟車而
國用以竭自古有國有家興亡盛衰未嘗不由此也隋
文帝因周氏平齊之後府庫充實庶事節儉未嘗虛費

開皇之初議者以比漢代文景有粟陳貫朽之積煬帝卽位大縱奢靡加以東西行幸輿駕不息征討四夷兵車屢動西失律於沙徼東喪師於遼碣數年之間公私罄竭財力旣殫國遂亡矣高祖發跡太原因晉陽宮留守庫物以供軍用旣平京城先封府庫賞賜給用皆有節制徵歛賦役務在寬簡未及踰年遂成帝業其後掌財賦者世有人焉開元已前事歸尚書省開元已後權移他官由是有轉運使租庸使鹽鐵使度支鹽鐵轉運使常平鑄錢鹽鐵使租庸青苗使水陸運鹽鐵租庸使兩稅使隨事立名沿革不一設官分職選賢任能得其

人則有益於國家非其才則貽患於黎庶此又不可不知也如裴耀卿劉晏李巽數君子便時利物富國安民足爲世法者也開元中有御史宇文融獻策括籍外剩田色役僞濫及逃戶許歸首免五年征賦每丁量稅一千五百錢置攝御史分路撿括隱審得戶八十餘萬田亦稱是得錢數百萬貫玄宗以爲能數年間拔爲御史中丞戶部侍郎融又畫策開河北王莽河漑田數千頃以營稻田事未果而融敗時又楊崇禮爲太府卿清嚴善勾剥分寸錙銖躬親不厭轉輸納欠折估漬損必令徵送天下州縣徵財帛四時不止及老病致仕以其子

慎矜爲御史專知太府出納其弟慎名又專知京倉皆以苛刻害人承主恩而徵責又有韋堅規宇文融楊慎矜之跡乃請於江淮轉運租米取州縣義倉粟轉市輕貨差富戶押船若遲留損壞皆徵船戶關中漕渠鑿廣運潭以挽山東之粟歲四百萬石帝以爲能又至貴盛又王鉷進計奮身自爲戶口色役使徵剝財貨每歲進錢百億寶貨稱是云非正額租庸便入百寶大盈庫以供人主宴私賞賜之用玄宗日益奢之數年間亦爲御史大夫京兆尹帶二十餘使又楊國忠藉椒房之勢承恩幸帶四十餘使云經其聽覽必數倍弘益又見寵貴

太平旣久天下至安人不願亂而此數人設詭計以侵
擾之凡二十五人同爲剥喪而人無敢言之者及安祿
山反於范陽兩京倉庫盈溢而不可名楊國忠設計稱
不可耗正庫之物乃使御史崔衆於河東納錢度僧尼
道士旬日間得錢百萬玄宗幸巴蜀鄭昉使劒南請於
江陵稅鹽麻以資國官置吏以督之肅宗建號於靈武
後用雲間鄭叔清爲御史於江淮間豪族富商率貸及
賣官爵以裨國用德宗朝討河朔及李希烈物力耗竭
趙贊司國計纖瑣刻剥以爲國用不足宜賦取於下以
資軍蓄與諫官陳京等更陳計策贊請稅京師居人屋

宅據其間架差等計入陳京又請籍列肆商賈資產以分數借之宰相同爲欺罔遂行其計中外沸騰人懷怨望時又配王公已下及嘗在方鎮之家出家僮及馬以助征行公私囂然矣後又張滂裴延齡王涯等剥下媚上此皆足爲世戒者也先是興元克復京師後府藏盡虛諸道初有進奉以資經費復時有宣索其後諸賊旣平朝廷無事常賦之外進奉不息韋臯劒南有日進李兼江西有月進杜亞揚州劉贊宣州王緯李錡浙西皆競爲進奉以固恩澤貢入之奏皆曰臣於正稅外方圓亦曰羨餘節度使或託言密旨乘此盜貿官物諸道有

謫罰官吏入其財者刻祿廩通津達道者稅之蒔蔬藝
果者稅之死亡者稅之節度觀察交代或先期稅入以
爲進奉然十獻其二三耳其餘沒入不可勝紀此節度
使進奉也其後裴肅爲常州刺史乃鬻貨薪炭按牘百
賈之上皆規利焉歲餘又進奉無幾遷浙東觀察使天
下刺史進奉自肅始也劉贊死於宣州嚴綬爲判官傾
軍府資用進奉無幾拜刑部員外郎天下判官進奉自
綬始也習以爲常流宕忘返大抵有唐之御天下也有
兩稅焉有鹽鐵焉有漕運焉有倉廩焉有雜稅焉今考
其本末叙其否臧以爲食貨志云武德七年始定律令

以度田之制五尺爲步步二百四十爲畝畝百爲頃丁男中男給一頃篤疾廢疾給四十畝寡妻妾三十畝若爲戶者加二十畝所授之田十分之二爲世業八爲口分世業之田身死則承戶者便授之口分則收入官更以給人賦役之法每丁歲入租粟二石調則隨鄉土所產綾絹絕各二丈布加五分之一輸綾絹絕者兼調綿三兩輸布者麻三斤凡丁歲役二旬若不役則收其傭每日三尺有事而加役者旬有五曰免其調三旬則租調俱免通正役並不過五十日若嶺南諸州則稅米上戶一石二斗次戶八斗下戶六斗若夷獠之戶皆從半

輸蕃胡內附者上戶丁稅錢十文次戶五文下戶免之
附經二年者上戶丁輸羊二口次戶一口下三戶共一
口凡水旱蟲霜爲災十分損四已上免租損六已上免
調損七已上課役俱免凡天下人戶量其資產定爲九
等每三年縣司注定州司覆之百戶爲里五里爲鄉四
家爲鄰五家爲保在邑居者爲坊在田野者爲村村坊
鄰里遞相督察士農工商四人各業食祿之家不得與
下人爭利工商雜類不得預於士伍男女始生者爲黃
四歲爲小十六爲中二十一爲丁六十爲老每歲一造
計帳三年一造戶籍州縣留五比尚書省留三比神龍

元年韋庶人爲皇后務欲求媚於人上表請以二十二爲丁五十八爲老制從之及韋氏誅復舊至天寶三年又降優制以十八爲中男二十二爲丁天下籍始造四本京師及東京尚書省戶部各貯一本以備車駕行幸省於載運之費焉凡權衡度量之制度以北方鉅黍中者八黍之廣爲分十分爲寸十寸爲尺十尺爲丈量以鉅黍中者容一千二百爲籥二籥爲合十合爲升十升爲斗三升爲大升三斗爲大斗十大斗爲斛權衡以鉅黍中者百黍之重爲銖二十四銖爲兩三兩爲大兩十六兩爲斤調鐘律測晷景合湯藥及冠冕制用小升小

兩自餘公私用大升大兩又山東諸州以一尺二寸爲大尺人間行用之其量制公私又不用齋合內之分則有抄撮之細天寶九載二月勅車軸長七尺二寸麵三斤四兩鹽斗量除陌錢每貫二十文先是開元八年正月勅頃者以庸調無憑好惡須準故遣作樣以頒諸州令其好不得過精惡不得至濫任土作貢防源斯在而諸州送物作巧生端苟欲副於斤兩遂則加其丈尺至有五丈爲疋者理甚不然濶一尺八寸長四丈同文共軌其事久行立樣之時亦載此數若求兩而加尺甚暮四而朝三宜令所司簡閱有踰於比年常例丈尺過多

奏聞二十二年五月勅定戶口之時百姓非商戶郭外
居宅及每丁一牛不得將入貨財數其雜匠及幕士并
諸色同類有蕃役合免征行者一戶之內四丁已上任
此色役不得過兩人三丁已上不得過一人其年七月
十八日勅自今已後京兆府關內諸州應徵庸調及資
課並限十月三十日畢至天寶三載二月二十五日赦
文每載庸調八月徵以農功未畢恐難濟辦自今已後
延至九月三十日爲限二十五年三月勅關輔庸調所
稅非少旣寡蠶桑皆資菽粟常賤糶貴買損費逾深又
江淮等苦變造之勞河路增轉輸之弊每計其運腳數

倍加錢今歲屬和平庶物穰賤南畝有十千之獲京師同水火之饒均其餘以減遠費順其便使農無傷自今已後關內諸州庸調資課並宜準時價變粟取米送至京逐要支用其路遠處不可運送者宜所在收貯便充隨近軍糧其河南河北有不通水利宜折租造綰以代關中調課所司仍明爲條件稱朕意焉天寶元年正月一日赦文如聞百姓之內有戶高丁多苟爲規避父母見在乃別籍異居宜令州縣勘會其一家之中有十丁已上者放兩丁征行賦役五丁已上放一丁卽令同籍共居以敦風教其侍丁孝假免差科廣德元年七月詔

一戶之中三丁放一丁庸調地稅依舊每畝稅二升天下男子宜二十三成丁五十八爲老永泰元年五月京兆麥大稔京兆尹第五琦奏請每十畝官稅一畝效古什一之稅從之二年五月諸道稅地錢使殿中侍御史韋光裔等自諸道使還得錢四百九十萬貫乾元以來屬天下用兵京師百寮俸錢減耗上卽位推恩庶寮下議公卿或以稅畝有苗者公私咸濟乃分遣憲官稅天下地青苗錢以充百司課料至是仍以御史大夫爲稅地錢物使歲以爲常均給百官大曆四年正月十八日勅有司定天下百姓及王公已下每年稅錢分爲九等

上上戶四千文上中戶三千五百文上下戶三千文中
上戶二千五百文中中戶二千文中下戶一千五百文
下上戶一千文下中戶七百文下下戶五百文其見官
一品準上上戶九品準下下戶餘品並準依此戶等稅
若一戶數處任官亦每處依品納稅其內外官仍據正
員及占額內闕者稅其試及同正員文武官不在稅限
其百姓有邸店行鋪及鑪冶應準式合加本戶二等稅
者依此稅數勘責徵納其寄莊戶準舊例從八等戶稅
寄住戶從九等戶稅比類百姓事恐不均宜各遞加一
等稅其諸色浮客及權時寄住田等無間有官無官各

所在爲兩等收稅稍殷有準八等戶餘準九等戶如數處有莊田亦每處稅諸道將士莊田旣緣防禦勤勞不可同百姓例並一切從九等輸稅其年十二月勅令關輔墾田漸廣江淮轉漕常加計一年之儲有太半之助其於稅地固可從輕其京兆來秋稅宜分作兩等上下各半上等每畝稅一斗下等每畝稅六升其荒田如能佃者宜準今年十月二十九日勅一切每畝稅二升仍委京兆尹及令長一一存撫令知朕意五年三月優詔定京兆府百姓稅夏稅上田畝稅六升下田畝稅四升秋稅上田畝稅五升下田畝稅三升荒田開佃者畝率